

Joel

Nopa chapolime quitlamicuase tlatocli

¹ Ya ni nopa tlajtoli tlen TOTECO nechmacac na, niJoel niitelpoca Petuel, ma nitlayolmelahua.

² Xijtlacaquilica cuali ni tlajtoli inhuehue tlacame tlen inisraelitame. Quena, xijtlacaquilica nochí tlen initztoque ipan ni tlali. Ax quema inquiitztoque se hueyi tlamatli queja nopa tlen nimechpohuilis. Niyon imotatahua ax quema quiitztoque se tlaohuijcayotl quej ni tlen oncas. ³ Teipa inquinpoohuilise imoconehua tlen inmechajsic, huan yajuanti quinpoohuilise ininconehua huan iniixhuihua tlen tlacajtiyase.

⁴ Hualahuij chapolime tlen tlatejtectihualahuij huan quicuase itlajca imomil. Huan tlen yajuanti quicahuase, hualase chapolime tlen patlantinemij huan quicuase. Huan teipa hualase chapolime tlen huitontihualahuij huan quicuase nopa pilquentzi tlen mocajtos. Huan teipa hualase nopa tlamatli chapolime tlen quitlamicuaj senquistoc nochí xihuít tlen onca, huan quitlamiltise nopa quentzi tlen nopa sequinoc chapolime quicajtose.

⁵ ¡Inihuintini, xiisaca! Quena, xichocaca imojuanti tlen inquiij xocomeca atl tlen cococ pampa inmechquixtilise nochí itlajca xocomecatl tlen ica inquichihuayayaj xocomeca atl. ⁶ Queja soldados tlen hualahuij para techtlanise, hualahuij nopa chapolime para quicuase nochí tlen eltoc ipan

ni tottal. Axaca huelis quinpohuas quesqui inimiyaca. Huan inintlancoch tlatequis queja inintlancoch tecuanime. Quena, ica inintlancoch quitlamicuase tlen onca queja se sihua león tlen mayana. ⁷ Quitlamiltise nochi xocomeca mili huan nochitlajca tohiguera cuahua. Huan quinximase nopa cuatini hasta chipahuac mocahuase imacuayohua.

⁸ Xichocaca chicahuac queja choca se ichpocatl huan moyoyontía yayahuic pampa mictoc tlen ihuaya monamictisquía. ⁹ Ama ayoc onca tlacajcahualistli tlen harina, niyon xocomeca atl tlen quitoyahuaj iixpa TOTECO. Chocase totajtzitzli tlen moquetzaj iixpa TOTECO, pampa mayantinemise. ¹⁰ Nochi mili tlamixolejtos. Ax tlen oncas. San oncas cuesoli campa hueli. Nochi toquistli ya polijtos. Nopa xocomeca mili ya huactos, huan nopa olivos pilinise, huajca ayoc oncas aceite. ¹¹ Imojuanti tlen intequitij ipan mila huan ipan xocomeca mili, inchocase ica cuesoli pampa nopa trigo huan cebada polijtos huan ax oncas pixquistli. ¹² Huaquis nochi xocomeca mili. Pilinise nochitlajca cuatini, huan huaquise nopa cuatini tlen temaca granadas, cocos huan manzanas. Senquistoc nochitlajca cuatini polihuise. Huan nojquiya ihuaya polihuise ininpaquilis nochitlame.

¹³ Imojuanti intotajtzitzli tlen inquietiquipanohuaj noTeco Dios campa tlaixpamitl, ximoyoyontica ica yoyomitl tlen fiero. Huan xichocaca ica cuesoli pampa ipan tiopamitl ayoc quihualicase harina huan xocomeca atl para tlacajcahualistli para ya. ¹⁴ Xiquinnotzaca nochitlame.

tlacame ma mosentilica iixpa TOTECO huan ma mosahuaca. Ma hualaca ipan itiopa nochihuehue tlacame huan nochitlacame tlen itztoque ipan nitlali. Huan ma quitlajtlanica itlapalehuil TOTECO huan ma chocaca iixpa.

Ni tlatzacuiltili elis fiero queja nopa tonali tlen TOTECO

¹⁵ Nopa tonali tlen itoca “nopa tonali tlen TOTECO” monechcahuía huan tlahuel fiero elis para tlacame. Quena, ipan nopa tonal TOTECO Tlen Quipiya Nochi Chicahualistli quitlamixolehuas nochitlen onca campa hueli.

¹⁶ Toixpa techquixtilise totlacualis huan tlamis nochipaquistli ipan itiopa Toteco Dios. ¹⁷ Nopa xinachtli tlen tijtocase tlamihuauis ipan mili. Nopa cuacaltini para sintli tiquinxolehuase pampa ax tlen oncas para ipan tijtlalise. ¹⁸ Tzajtzise nochihuacaxme ica mayantli pampa ax oncas sacatl. Huan tlahuel tlaijiyohuise nochiborregojme.

¹⁹ TOTECO, xinechpalehuiqui. Quena, nimitznotza TOTECO pampa titlquitlamitlati nochixhuitl huan nochicuatini ipan cuatitlamitl.

²⁰ Huaquis nochipilatljitzitzi hasta nopa tlapiyalime ipan cuatitlamitl mitztzajtzilise para atl. Huan tlamihuauis nochisacatl.

2

¹ Xijpitzaca nopa tlapiyalime ipan altepetl Jerusalén [2:1 Tepetl Sion eltoc seyoc itoca Jerusalén], itepe TOTECO tlen tlatzejzeloltic. Ma huihuipicaca nochitlen itztoque ipan tlali Judá pampa ya huala nopa tonali

tlen itoca itonal TOTECO. Quena, monechcahuía nopa tonali tlen itoca itonal TOTECO quema yajaya tetlatzacuiltis. ² Elis se tonali tlen tzintlayohuiloltl, tlen tlatzacuiltili huan cuesoli. Nopa tonali tlamixtentos huan tlayayahuiyas. Ayoc nesis tonati.

Hualahuij nopa chapoltzitzti

Queja quema pehua tlanestihuala huan teipa campa hueli onca tlahuili, queja nopa tiquinítase nopa chapoltzitzti tlen hualase queja tlahuell Miyac soldados. Tlahuel Miyac chicahualistli quipiyase. Ax quema aca quiitztoc se tlamatli quej ni, niyon ax quema sampa quiitase tlen tlatcise teipa ipan ni tlapatepactli. ³ Yajuanti itztoque queja tlelementli tlen quipipitzohua nochitlen eltoc inechca. Quitzontlamiltise nochitlen eltoc iniixmelac. Huan campa panose mocahuas queja ax tleno eltoya. Ni tlali eliyaya queja ixochimil TOTECO quema aya ajsiyayaj. Pero quema ya panotose, mocahuas queja se huactoc tlali campa ax tleno eli, pampa niyon se pilxihuitzi ax hueli momanahuis. ⁴ Nopa Miyac chapolime nesise queja pilcahuayo jtzitzli tlen motlalohuaj chicahuac. ⁵ Quema huitonise, tlacaquistis chicahuac queja carrojme tlen yohuij ipan tlatehuij-cayotl. Huan caquistis queja sasahuaca tlasoli huactoc ipan Miyac tlitl o queja Miyac soldados tlen yohuij para tlatehuisse ica Miyac chicahualistli.

⁶ Nochi tlacame huihuipicase quema quinitase. Nochi ininxayac chipalantiyase. ⁷ Nopa Miyac chapolime motlalojti hualase queja tlacame tlen mooquichmatij huan ax majmahuij. Tlejcose ipan

tepamitl ipan altepetini queja soldados tlen momachtijtoque tlatehuise. Sese yajuanti quimati iojhui huan huala xitlahuac. ⁸ Ax mocuatopehuase. Sese nemis ipan iojhui. Ax hueli timomanahuise tlen yajuanti pampa niyon se machete ax quincocosquía. ⁹ Ajsiquij ipan altepetl, huan tlejcoquij ipan tepamitl huan calaquise ipan caltini. Quena, calaquise ipan ventanas queja calaqui se tlaxtejquetl. ¹⁰ Quema noja itztose ipan ojtlí para ajsise, tlaltepactli huihuipicas iniixpa. Elis queja elhuicactli momajmatis pampa tonati huan metztlí ayoc tlatlanextise huan sitlalime ayoc tlahuise. ¹¹ TOTECO quinyacanas huan quinnahuatis tlachque ma quichihuaca. Yajuanti itztose isoldados huan quicaquise itos tlen caquisti queja se tlatomonilotl. Itztose tlahuel miyac hasta ax aqui huelis quinpohuas quesqui. Huan quineltquilise tlen quinnahuatía. Tlahuel temajmati huan tlahuel fiero elis ni tonali tlen itoca itonal TOTECO. Axaca huelis quiijiyohuis.

Itlasojtlacayo TOTECO

¹² Huan yeca TOTECO quiijtohua: “Huajca ama ximoyolcuepaca noca na ica nochí imoyolo. Ximosa huaca, xichocaca huan xitlahuelchihuaca ipampa imotlajtlacolhua.”

¹³ Ax san xijtzayanaca imoyoyo, pero xijtzayanaca imoyolo. Ximocuepaca ica imoTECO Dios, pampa yajaya quiipyas hueyi iyolo huan tetlasojtlas. Yajaya tlahuel mochiya huan ax nima cualani. Tlahuel teicnelía huan ax quinequi tetlatzacuiltis. ¹⁴ Nohueli inmechnejnehuilis huan moyolcuepas huan inmechcahuilijtehuas se tlatiochihualistli

huan ax se tlatzacuiltyli. Huelis inmechmacas harina huan xocomeca atl para inquipiyase tlacajcahualistli para inquimacase ya queja achtohuiya inquipixtoyaj pampa nopa tlacajcahualistli yajaya iaxca huan quinamiqui quiselis.

¹⁵ Xijpitzaca tlapitzali ipan altepetl Jerusalén [2:15 O tepetl Sion.]. Xiquinyolmelahuaca nochi tlacame para ma mosahuaca. Ma mosentilica TOTECO itlacajhua ipan se tlasentilistli tlen tlatzejzelotic. ¹⁶ Xiquinsentilica nopa huehue tlacame huan nopa coneme, hasta nojquiya nopa pilconetzitzi tlen noja chichij. Tlen onmosihuajtitoc ma quisa ipan nopa calijtic campa mocahua huan ma quihualica isihua. Nochi ma motlapajpacchihuaca iixpa TOTECO.

¹⁷ Ma chocaca nopa totajtzitzi tlen tequipanohuaj iixpa TOTECO. Ma moquetzaca tlatlajco tlaixpamitl huan nopa miyac tlacame nechca puerta huan ma momaijtoca ica TOTECO huan quiijtose: “TOTECO, xitechtlapojo polhui timotlacajhua. Axaca xijcahuili ma toca huetzca pampa timoaxcahua. Amo xiquincahuili tlacame tlen ehuani ipan sequinoc tlaltini tlen ax mitzhueyichihuaj ma tlen hueli camatica tlen tojuanti huan quiijtose: ‘¿Canque itztoc imoTECO Dios? ¿Ax hueli inmechpalehuis?’ ”

TOTECO tlananquilis

¹⁸ Huajca TOTECO quitlasojtlas itlal huan quintlapojpolhuis itlacajhua, ¹⁹ huan quiijtos: “Xiquitaca, nimechtitlanilis trigo, xocomeca atl huan aceite para ica xiixhuica. Ayoc quema nijcahuas para tlacame tlen ax nechneltoquiláj ma

imoca huetzcaca. **20** Teipa niquinhuejcatlalis nopa chapoltzitzi tlen hualahuij neca norte queja soldados. Huan niquinmajcahuas ipan nopa huactoc tlali campa ax tleno eli huan nopano miquise. Niquinisahuiltis tlen quintlayacancuiliyayaj ipan nopa Hueyi Atl Mictoc campa quisa tonati, huan tlen yohuiyayaj inintepotzco misahuise ipan Hueyi Atl Mediterráneo campa oncalaque tonati. Huan inintlacayohua palanise huan mijmiyotise, pampa na nijchihuas huejhueyi tlamantli.”

21 Imojuanti tlen initztoque ipan ni tlali, amo ximomajmatica. Xipaquica miyac pampa TOTECO inmechchihuilijtoc huejhueyi tlamantli. **22** Huan intlapiyalime tlen campa hueli innejnemij, amo ximajmahuica pampa sacapetlatl sampa moseliltis. Cuatini sampa temacase inintlajca huan oncas higos huan xocomeca atl ica imiyaca.

23 Intlacame tlen Jerusalén, xipaquica. Xipaquica ipan TOTECO pampa yajaya quichihuas ma huetzis atl quema monequi quema achtohui intocase. Quena, quichihuas ma huetzis atl quema achtohui monequis para nopa tlen inquitoque huan sampa quema teipa monequis, senquistoc queja achtohuiya quichihuayaya. **24** Huajca oncas se cuali pixquistli tlen trigo huan oncas miyac xocomeca atl huan aceite.

25 Huan TOTECO quijitos: “Na nimechcuepilis nochí nopa pixquistli tlen quicuajque nopa chapolime tlen patlantihualajque, huan tlen tlaxolejque, huan tlen tlatejtectihualajque huan tlen huitontihualajque. Quena, nimechmacas

sampa nochí tlen quitlamicuajque nopa miyac chapoltitzi tlen na nimechtitlanili. ²⁶ Huan intlacuase hasta inixhuise, huan innechhueyichihuase na, niimoTECO Dios pampa na nimechchihuilis huejhueyi tlamantli. Huan ax aqui sampa inmechpinahualtis, innotlacajhua. ²⁷ Huan quej ni inisraelitame inquimatis para na, niimoTECO Dios, niitztoc tlatlajco imojuanti. Huan inquimatis para na, niimoTECO Dios huan ax aqui seyoc. Huan imojuanti tlen innotlacajhua axaca sampa inmechpinahualtis.

Hulas Itonal TOTECO tlen tlatzejzeloltic

²⁸ “Huan teipa nijtitlanis Notonal ipan nochí tlacame. Imoconebla, tlacame huan sihuame, tlayolmelahuase notlajtol queja tiocamanalohuani. Huan nopa huehuentzitzi campa imojuanti quipiyase temictli. Huan imotelpocahua quiitase tlanextili tlen na niquinnextilis. ²⁹ Huan nojquiya ipan nopa tonali niquinmacas Notonal tlen tlatzejzeloltic imotequipanojcahua, tlacame huan sihuame.

³⁰ “Nijnextis ipan elhuicac huan ipan tlaltepactli huejhueyi tlanescayotl tlen ica tlacame quisentlachilise. Monextis estli huan tliltl. Huan oncas poctli tlen moquetzas queja tlaquetzali. ³¹ Tonati mocuepas yayahuic huan metztlí mocuepas queja estli quema aya ajsi nopa hueyi huan fiero tonali quema na, niimoTECO nitetlajtolsencahuas. ³² Pero nochí tlen nechnojnotzase na, niimoTECO, para ma niquinpalehui, niquinmaquixtis. Pampa itztose ipan tepetl Sion huan ipan altepetl Jerusalén

sequin tlacame tlen niquinmaquixtis queja nimechilhuijtoc. Nopano mocahuase yoltoque yajuanti tlen niquintlapejpenijtoc.”

3

TOTECO quintlajtolsencahuas tlen ax israelitame

¹ Huan TOTECO nojquiya quiijto: “Quema ajsis nopa tonali, nijchihuas ma mopatla ininnemilis nopa tlacame tlen tlali Judá huan tlen altepetl Jerusalén huan sampa quipiyase nochí tlamantli tlen cuali. ² Teipa niquinseñilis nochí tlaltini ininsoldados huan niquinhuicas ipan nopa tlamayamitl tlen Josafat campa niquntlajtolsencahuas ica tlen quinchihuilijtoque noisraelita tlacajhua. Pampa quinsemanque israelitame tlen noaxcahua ipan nochí tlaltini ipan tlaltepactli huan momajmacaque notlal.

³ “Nojquiya momajmacaque notlacajhua hasta mahuiltijke ica piltetzitzi para quiitase ajqueya quitocarosquía sese yajuanti. Temacaque inioquichpilhua para huelque itztose se tlalochtli ica se ahuilnenca sihuatl. Huan quinnamacaque sihuapilme para se quentzi tlaili para moihuintise.

TOTECO quintlajtolsencahuas nochí tlaltini

⁴ “¿Tlachque inquinequij noca na, imojuanti tlen inehuani Tiro, Sidón huan tlali Filistea? ¿Inquinequij inmomacuepase ica na por ica se tlenijqui? Intla queja nopa inquinequij inquichihuase, nimantzi nimechmacuepilis ica tlen inquichijtoque. ⁵ Imojuanti tlen inquiixtejque nooro huan noplata.

Inquihuicaque nochí nopa tlamantzitzi tlen yejyectzitzí nijpixtoya huan inquicalaquijsque ipan inintiopahua imotiotzitzi.⁶ Inquihuicaque notlacajhua tlen tlali Judá huan altepetl Jerusalén huejca huan inquinnamaquiltijque griego tlacame para quintequipanose san tlapic.⁷ Pero na niquinquixtis tlen campa inquinnamaacaque huan nimechchihuas xitlaijiyohuica queja yajuanti tlaijiyohuijque.⁸ Na nojquiya niquinnamaquiltis imocone hua ica tlali Judá ehuani huan yajuanti quinnamaquiltise nopa sabeo tlacame tlen tlahuél huejca ehuani.” Queja nopa quiijto TOTECO.

⁹ “Xiquinmatiltica nochí tlacame ipan nochí tlaltini para ma hualaca mocualtlalise para tlatehuijçayotl. ¡Xiquinisihuiltica imosoldados tlen mooquichmatij ma tlayacanaca para tlatehuisse!¹⁰ Imoazadones xijchihuaca machetes huan xijtlalica ipan tlitl imohuingaros para inquisencahuase imocuatlaminhua tlen huejhuehueyac. Huan tlen ax quipiya fuerza ma momachtis quejatza tlatehuis hasta huelis moilhuis quipiya chicahualistli.¹¹ Nochi imojuanti tlen inehuani nochí tlaltini campa hueli, ximoisihuiltica huan nopano ximosentilica.”

Joel quiijtohua: „Huan ama TOTECO, nojquiya xiquinsentili nochí moelhuicac ejcahua tlen más mosemacaj.

¹² „TOTECO quinanquilía: „Ma mocualtlalica nochí tlacame ipan nochí tlaltini para tlatehuijçayotl huan ma yaca nopa tlamayamitl tlen Josafat pampa nopano nimosehuis para

niquintlajtolsencahuas nochitlaltini campa hueli.
¹³ Nopano nijchihuas notequi queja tlacame quitequij trigo tlen icsitoc ica ininhueyi tepos. Queja tlacame ipan moquejquetzaj xocomecatl itlajca para quiqxtilise iayo, na niquinxacualos pampa tlahuels onpano fiero inintlajtlacolhua.”

¹⁴ Itztose millones huan millones tlen tlacame tlen quichiyase ipan nopa tlamatayamitl tlen itoca Tlapejpenilistli pampa monechcahuía nopa tonali tlen itoca itonal TOTECO. Huan nopano ica sampa ipan nopa tlamatayamitl TOTECO quitlapejpenis tlachque elis inintlatzacultilis.

¹⁵ Tonati huan metztli tzintlayohuilis, huan sitlalime ayoc tlahuise. ¹⁶ Huan itos TOTECO tlen caquistis tlen nopa tepetl Sion elis queja nanalca se hueyi tecuani tlen cualantoc. Quena, quema TOTECO camatis tlen Jerusalén itos caquistis queja se tlatomonilotl, huan elhuicactli huan tlaltepactli tlahuels huihuipicase. Pero israelitame motemachise ipan TOTECO pampa yajaya elis ininchicahualis huan quinmanahuis itlacajhua.

Tlatiochihualistli para tlali Judá ehuani

¹⁷ “Huajca quena, inquimatise para na, ni-Dios imoTECO. Inquimatise para niitztoc ipan Sion, notepe tlen tlatzejzeloltic. Huan altepetl Jerusalén elis se altepetl tlen tlatzejzeloltic huan sequinoc tlaltini ehuani ayoc quema calaquise nopano para quitehuise.

¹⁸ “Ipan nopa tonali nochiquipyase nochitlamanli tlen cuali. Nopa tepetini quipyase xocomeca atl hasta mocahua. Huan nopa tlachiquili quipyase tlapiyalime tlen temaca tlahuels miyac

lechi. Nochi atlajtli ipan tlali Judá quitemohuise miyac atl. Huan tlen notiopa, niimoTECO, meyas atl tlen quiatequis tlali campa hueli hasta nopa tlamayamitl tlen eltoc huejca ipan Sitim. ¹⁹ Pero tlali Egipto xolehuis huan tlali Edom mocahuas queja se huactoc tlali campa ax tleno eli pampa yajuanti inmechtehuijque inJudá ehuani huan ipan imotlal quityajque inieso israelitame tlen ax tleno quichijtoyaj.

²⁰ “Huan tlali Judá huan altepetl Jerusalén sampa quinpiyase miyac tlacame tlen nopano itztose hasta iniixhuihua quinpiyase iniixhuihua huan para nochipa. ²¹ Huan na niquintlapojpolhuis notlacajhua tlen aya niquintlapojpolhuijtoc. Huan na, niimoTECO, nimocahuas para niitztos ipan tepetl Sion.”

**Itlajtol toteco: Santa Biblia
Bible without Deuterocanon in Nahuatl, Huasteca
Oriental (MX:nheBI:Nahuatl, Huasteca Oriental)**

copyright © 2005 Wycliffe Bible Translators, Inc.

Language: Nahuatl, Huasteca Oriental

Dialect: Huasteca Oriental

Translation by: Wycliffe Bible Translators, Inc.

Náhuatl, Huasteca Oriental [nhe], Mexico

Copyright Information

© 2005, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Nahuatl, Huasteca Oriental

© 2005, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

**PDF generated using Haiola and XeLaTeX on 11 Nov 2022 from source files
dated 29 Jan 2022
6e359f6d-e93f-5d56-819d-a3feae810a1b**